

VENDIM
Nr. 460, datë 22.5.2013
PËR PËRCAKTIMIN E KRITEREVE, RREGULLAVE DHE PROCEDURAVE TË
DHËNIES ME QIRA TË TOKAVE BUJQËSORE NË PRONËSI TË SHTETIT

I azhurnuar me:

- *VKM Nr. 525, datë 16.6.2015 "Për një shtesë në Vendimin Nr. 460, datë 22.5.2013, të këshillit të ministrave, "Për përcaktimin e kriterëve, rregullave dhe procedurave të dhënies me qira të tokave bujqësore në pronësi të shtetit"*

- *VKM Nr.143, datë 24.02.2016 "Për disa ndryshime në Vendimin Nr. 460, datë 22.5.2013, të Këshillit të Ministrave, "Për përcaktimin e kriterëve, rregullave dhe procedurave të dhënies me qira të tokave bujqësore në pronësi të shtetit".*

Në mbështetje të nenit 100 të Kushtetutës dhe të neneve 9, 10 e 15 të ligjit nr. 8318, datë 1.4.1998 "Për dhënien me qira të tokës bujqësore e pyjore, të livadheve dhe kullotave që janë pasuri shtetërore", të ndryshuar, me propozimin e Ministrit të Bujqësisë, Ushqimit dhe Mbrojtjes së Konsumatorit, Këshilli i Ministrave

VENDOSI:

I. PËRKUFIZIME

Në zbatim të këtij vendimi, me termat e mëposhtëm kuptohet:

1. "Tokë", në kuptim të këtij vendimi, nënkupton tokën që është pasuri shtetërore, klasifikuar në fondin e tokës bujqësore, sipërfaqet që, në dokumentacionin kadastral, figurojnë në kategorinë e resursit tokë bujqësore.

~~"Tokë", në kuptim të këtij vendimi, nënkupton tokën që është pasuri shtetërore, klasifikuar në fondin e tokës bujqësore, sipërfaqet që, në dokumentacionin kadastral, figurojnë në kategorinë e resursit tokë bujqësore.~~

2. "Ministria", Ministria e Bujqësisë, Ushqimit dhe Mbrojtjes së Konsumatorit;

3. "Ministri", Ministri i Bujqësisë, Ushqimit dhe Mbrojtjes së Konsumatorit;

4. Shkurtimet në emërtimet e disa institucioneve janë:

"DAMT", Drejtoria e Administrimit dhe Mbrojtjes së Tokës në Qark;

"ZVRPP", Zyra Vendore e Regjistrimit të Pasurisë së Paluajtshme;

"DRB", Drejtoria Rajonale e Bujqësisë;

"ZMMT" "ZMMT", Zyra e Menaxhimit dhe Mbrojtjes së Tokës në komunë ose bashki;

"BQTB", Bordi i Qiradhënies së Tokave Bujqësore.

II. OBJEKTI I QIRADHËNIES

1. Objekt i qiradhënies, sipas këtij vendimi, janë të gjitha sipërfaqet e tokës në pronësi të shtetit.

2. Sipas përcaktimit të nenit 14 të ligjit nr. 8318/1998 "Për dhënien me qira të tokës bujqësore e pyjore, të livadheve dhe kullotave që janë pasuri shtetërore", janë objekt i këtij vendimi për qiradhënie edhe sipërfaqet e tokës bujqësore të përfshira brenda zonave turistike, të përcaktuara me vendimin nr. 88, datë 1.3.1993 të Këshillit të Ministrave "Për miratimin e zonave që kanë përparësi zhvillimin e turizmit", të ndryshuar, si dhe tokat bujqësore brenda kufizimeve të parqeve kombëtare dhe zonave rreptësisht të mbrojtura, por miratimi përfundimtar i qiradhënies së tyre bëhet nga Këshilli i Rregullimit të Territorit të Republikës së Shqipërisë.

3. Shfuqizuar.

III. SUBJEKTET NË PROCESIN E QIRADHËNIES SË TOKAVE

1. Autoriteti qiradhënës për dhënien me qira të tokave, është Ministria.

2. Për shqyrtimin e kërkesave, organizimin e procedurave konkurruese dhe për vlerësimin e ofertave për marrje me qira të tokës, Ministri urdhëron ngritjen pranë Ministrisë të BQTB-së.

3. BQTB-ja përbëhet nga jo më pak se 5 (pesë) anëtarë, në përbërje të të cilit duhet të përfshihen, të paktën:

- një përfaqësues i drejtorisë përgjegjëse për administrimin e pronave publike në Ministri;

- një specialist agronom ose i blegtorisë, sipas rastit, nga Ministria;

- një specialist ekonomist ose specialist urbanist, sipas rastit, nga Ministria;

- një jurist nga Ministria;

- drejtori i drejtorisë rajonale të bujqësisë, në qarkun ku ndodhet toka objekt qiradhënieje.

4. BQTB-ja ka për detyrë:

a) shqyrtimin e kërkesave dhe projekteve të paraqitura nga subjektet për marrjen me qira të tokës bujqësore dhe marrjen e vendimeve brenda afateve që përcaktohen në këtë vendim;

b) organizimin e procedurës konkurruese të ofertave dhe garantimin e barazisë ndërmjet subjekteve, kur për të njëjtën sipërfaqe toke bujqësore është paraqitur më shumë se një kërkesë për qiramarrje;

c) shpalljen dhe njoftimin e vendimit të marrë nga bordi për qiradhënie.

5. Në rastet kur sipërfaqja e tokës, objekt i kërkesës për qiramarrje, është nën 15 ha, atëherë Ministri mund të urdhërojë kryerjen e procedurave për qiradhënien, të parashikuara në këtë vendim, direkt nga ana e drejtorisë rajonale të bujqësisë të qarkut ku ndodhet sipërfaqja e tokës, në cilësinë e autoritetit qiradhënës të deleguar. Në këtë rast, përbërja e BQTB-së që do të ngrihet pranë drejtorisë përkatëse të bujqësisë përcaktohet në urdhrin e Ministrit.

6. Kërkesa për marrjen me qira të tokës objekt i këtij vendimi, mund të bëhet nga çdo person, fizik ose juridik, vendas apo i huaj.

IV. PROCEDURAT QË NDIQEN NGA BQTB-ja PËR DHËNIEN ME QIRA TË TOKAVE

1. Subjektet e përcaktuara në pikën 6 të kreut III të këtij vendimi, të cilët kërkojnë për të marrë me qira tokë, paraqesin kërkesën pranë Ministrisë në cilësinë e autoritetit qiradhënës.

2. Kërkesa paraqitet me shkrim dhe përmban:

a) identitetin e kërkesës dhe, në rastin e personave fizikë ose juridikë, dokumentin e regjistrimit si subjekt tregtar;

b) planimetrinë e sipërfaqeve të parcelave (pronave) që kërkohen për qiramarrje në shkallën 1:2500;

c) pasqyrën kadastrale të parcelave (pronësive) me madhësinë e sipërfaqes për secilën prej tyre;

ç) vërtetimin e siguar nga ZVRPP-ja për statusin juridik të pronësisë, për të gjitha parcelat e tokës objekt kërkesë për qiramarrje, në rastin kur këto sipërfaqe përfshihen brenda zonave kadastrale ku është kryer regjistrimi fillestar i pasurive të paluajtshme ose vërtetimin nga DAMT-ja e qarkut, në rastin kur këto sipërfaqe përfshihen në zona kadastrale ku nuk është kryer regjistrimi fillestar i pasurive të paluajtshme;

d) vërtetimin e lëshuar nga DAMT-ja e qarkut për kategorinë e tokës sipas bonitetit për parcelat objekt i kërkesës për qiramarrje;

dh) një përshkrim të përgjithshëm të projektit për veprimtarinë bujqësore që do të zhvillohet mbi tokën objekt kërkesë për qiramarrje, në të cilën specifikohen kulturat bujqësore ose speciet e bimëve që do të mbillen, teknologjitë që do të aplikohen në kultivimin e bimëve dhe përpunimin e produkteve, investimet në infrastrukturë (kullim, ujitje, sistemim etj.), të shprehura në tregues fizikë dhe monetarë, tregu i shitjes, burimet e financimit të shprehura në vlerë, që garantojnë investimet, ndikimin e veprimtarisë në shtimin e numrit të të punësuarve;

e) afatin e përdorimit të tokës për qiramarrje, në varësi edhe të kulturave bujqësore ose specieve të bimëve që do të mbillen.

ë) vërtetimin se nuk ka detyrime financiare ose ligjore të pashlyera ndaj shtetit.

3. Kryetari i BQTB-së, kur kërkesa e paraqitur është në përshtatje me përcaktimet e pikës 2 të këtij kreu, kryen këto procedura:

3.1. Verifikon pranë ZVRPP-së dhe DAMT-së saktësinë e të dhënave dhe treguesve të përcaktuara në pikën 2 të këtij kreu, brenda 15 (pesëmbëdhjetë) ditëve nga regjistrimi i kërkesës së paraqitur;

3.2. Organizon dhe ndërmerr masat e nevojshme për zhvillimin e procedurës së konkurrimit për dhënie me qira të tokës bujqësore objekt i kërkesës së regjistruar, si dhe kryen njoftimin publik për paraqitjen e ofertave për sipërfaqen e tokës që vihet në dispozicion për qiradhënie, objekt i kërkesës së parë, të dërguar pranë autoritetit qiradhënës.

4. Njoftimi publik bëhet në një gazetë kombëtare me tirazh të lartë për tri ditë radhazi, në faqen zyrtare të internetit të Ministrisë, pranë komunës ose bashkisë ku ndodhet

sipërfaqja e kërkuar, si dhe pranë ambienteve të drejtorive rajonale të bujqësisë në qarqe.

5. Njoftimi për zhvillimin e procedurës së konkurrimit për dhënien e tokës me qira përmban qëllimin e dhënies me qira së tokës, sipërfaqen objekt qiradhënieje, vendndodhjen e saj, vlerën më të ulët (minimale) sipas pikës 1 të kreut V, me të cilën fillon procedura e konkurrimit, si dhe vendin, datën dhe orën e zhvillimit të kësaj procedure.

6. Afati i paraqitjes së ofertave zgjat 30 (tridhjetë) ditë që nga data e publikimit të parë të njoftimit për procedurën konkurruese.

7. Subjektet e interesuara për marrjen me qira të tokës bujqësore objekt i procedurës së shpallur, përfshirë edhe subjektin, i cili ka paraqitur kërkesën e parë, i paraqesin ofertat për qiramarrje pranë autoritetit qiradhënës, brenda afateve të përcaktuara në njoftimin për zhvillimin e procedurës së konkurrimit.

8. Ofertat, me qëllim kualifikimin e tyre për vlerësim, duhet të përmbajnë dokumentacionin e mëposhtëm:

a) identitetin e të interesuarit, si dhe në rastin e personave fizikë ose juridikë, dokumentin e regjistrimit si subjekt tregtar;

b) një përshkrim të hollësishëm teknik të projektit për veprimtarinë bujqësore që do të zhvillohet, përcaktimin e kulturave bujqësore ose të specieve të bimëve që do të mbillen, teknologjitë që do të aplikohen në kultivimin e bimëve dhe përpunimin e produkteve, investimet në infrastrukturë (kullim, ujitje, sistemim etj.), të shprehura në tregues fizikë dhe monetarë, burimet e financimit të shprehura në vlerë që garantojnë investimet, ndikimin e veprimtarisë në shtimin e numrit të të punësuarve;

c) planbiznesin e detajuar të aktivitetit që do të ushtrohet;

ç) studimin për ndikimin në mjedis të projektit;

d) afatin e qiramarrjes së sipërfaqes së kërkuar, në varësi edhe të kulturave bujqësore ose specieve të bimëve që do të mbillen;

dh) kohën e fillimit dhe mbarimit të mbjelljes së tokës me kultura bujqësore, në rastin e qiramarrjes së saj për pemëtore, vreshta dhe ullishte;

e) nivelin e çmimit (lek/ha në vit) që ofron për marrjen me qira të tokës bujqësore;

ë) sigurimin e ofertës në vlerën e qirasë së një muaji, duke e llogaritur me vlerën e shpallur në njoftimin për konkurrim;

f) vërtetimin se nuk ka detyrime financiare ose ligjore të pashlyera ndaj shtetit.

9. Ofertat paraqiten në një zarf të mb yllur, i cili duhet të përmbajë një kopje origjinale dhe një të fotokopjuar të dokumentacionit të ofertës, si dhe ku përcaktohen qartë identiteti dhe adresa e personit, fizik apo juridik, të interesuar.

10. Në procesin e hapjes së ofertave marrin pjesë të gjithë anëtarët e BQTB-së dhe subjektet e interesuara për qiramarrje ose përfaqësuesit e tyre, të pajisur me prokurë dhe dokument identifikimi.

11. Kur ofertat nuk plotësojnë kushtet për kualifikim, atëherë ato skualifikohen nga konkurrimi. Ofertat e kualifikuara si të rregullta nga përmbajtja e dokumentacionit të paraqitur vlerësohen në vijim pa praninë e pjesëmarrësve, sipas kriterëve të vlerësimit.

12. BQTB-ja harton procesverbalin e zhvillimit të procedurës konkurruese, ku përshkruan ofertuesit, dokumentacionin e paraqitur prej tyre, si dhe ofertuesit e kualifikuar e ata të skualifikuar.

13. BQTB-ja, brenda 10 (dhjetë) ditëve nga data e hapjes së procedurës konkurruese, shqyrton ofertat e kualifikuara si të rregullta, vlerëson me pikë ofertën, sipas kriterëve të vlerësimit, dhe harton vendimin për renditjen e ofertueseve.

14. Fitues i procedurës konkurruese shpallet me vendim të BQTB-së, subjekti me më shumë pikë të grumbulluara.

15. Kriteret e vlerësimit të ofertave dhe mënyra e përllogaritjes së tyre, përcaktohen me udhëzim të Ministrit të Bujqësisë, Ushqimit dhe Mbrojtjes së Konsumatorit.

16. Subjektet pjesëmarrëse në konkurrim kanë të drejtë të ankohen, me shkrim, pranë Ministrit, kundër vendimit të BQTB-së, brenda 5 (pesë) ditëve nga data e marrjes së njoftimit të vendimit.

17. Në përfundim të afateve të ushtrimit të së drejtës së ankimit, të përcaktuar në pikën 16 të këtij kreu, në rast se nuk ka asnjë ankim të depozituar, kryetari i BQTB-së i paraqet Ministrit, brenda afatit të përcaktuar në pikën 13, një raport përmbledhës dhe i propozon për miratimin e fituesit të procedurës konkurruese për dhënien me qira të tokës bujqësore.

18. Ministri, si në rastin e parashikuar në pikën 16, ashtu edhe në rastin e parashikuar në pikën 17 të këtij kreu, e shqyrton ankimin ose propozimin e BQTB-së brenda 15 (pesëmbëdhjetë) ditëve nga marrja e tyre. Kur Ministri vlerëson se në procedurën konkurruese janë shkelur kriteret procedurale, atëherë ai anulon procedurën e zhvilluar. Në rast se Ministri vlerëson se ka pasur parregullsi në kryerjen e vlerësimit, atëherë ai urdhëron rivlerësimin e ofertave të paraqitura për marrjen me qira të tokës.

19. Në rast të miratimit të propozimit të BQTB-së, Ministri urdhëron lidhjen e kontratës së qirasë me subjektin fitues dhe nënshkruan kontratën përkatëse. Ministri mund t'ia delegojë nënshkrimin e kontratës titullarit të një strukture të brendshme të Ministrisë ose të një institucioni në varësi të saj.

20. Kontrata për dhënien me qira të tokës sipas pikës 19 të këtij kreu, duhet të përmbajë të drejtat dhe detyrimet e qiradhënësit, si dhe të drejtat dhe detyrimet e qiramarrësit të përcaktuara në dispozitat e ligjit nr. 8318 datë 1.4.1998 "Për dhënien me qira të tokës bujqësore e pyjore, të livadheve dhe kullotave që janë pasuri shtetërore", të ndryshuar, në dispozitat e këtij vendimi, si dhe në kriteret e ofertës së qiramarrësit në bazë të të cilit ai ka fituar të drejtën e marrjes me qira të ~~tokës bujqësore pasuri shtetërore~~ dhe miratohet me urdhër të Ministrit.

Modeli i përmbajtjes së kontratës miratohet me urdhër të Ministrit.

21. Në rastin e përmendur në pikën 5 të kreut III, paraqitja e ankesave, si dhe propozimi i BQTB-së kryhen sipas pikave 16, 17 e 18 të këtij kreu.

22. Drejtoria përgjegjëse për administrimin e pronave publike në Ministri, monitoron zbatimin e kontratave të qirasë nga qiramarrësit, si dhe në rastin e përmendur në pikën 5 të kreut III, merr raportime periodike apo kontrollon drejtorinë rajonale të bujqësisë për monitorimet e kryera nga kjo drejtori për zbatimin e kontratës së qirasë.

23. Në rastin kur, pas shpalljes së njoftimit për procedurë konkurruese për qiradhënie dhe mbarimit të afatit të përcaktuar në njoftim është paraqitur vetëm një ofertë, BQTB-ja e shqyrton ofertën e paraqitur në datën e njoftuar, e vlerëson atë me kriteret e përcaktuara për qiradhënie dhe merr vendimin përkatës, të cilin e paraqet për miratim pranë Ministrit.

V. PËRCAKTIMI I VLERËS VJETORE TË QIRADHËNIES SË TOKAVE

1. Vlera vjetore e dhënies me qira të tokës, si në rastet kur për të njëjtën sipërfaqe paraqitet më shumë se një ofertë, ashtu edhe në rastet kur rezulton një ofertë e vetme, përcaktohet në bazë të kategorisë së bonitetit, brenda niveleve që vijojnë:

Kategoria e tokës sipas bonitetit	I	II	III	IV	V	VI	VII	VIII-X
Vlera minimale lekë/ha në vit	17000-27000	15000-22000	12000-20000	10000-15000	7000-12000	5000-10000	5000-10000	6000

2. Përcaktimi i vlerës së qirasë për çdo tokë objekt i kërkesës për qiramarrje, për të cilën do të shpallet procedura konkurruese, përcaktohet nga komisioni i vlerësimit, i ngritur menjëherë pas marrjes së kërkesës, me urdhër të Ministrit.

3. Komisioni në përcaktimin e vlerës fillestare të qirasë për hapjen e procedurës konkurruese merr parasysh karakteristikat në lidhje me bonitetin e tokës, gjendjen e infrastrukturës ujëtare dhe kulluese të saj, distancën nga tregjet, nivelin e industrisë agropërpunuese, si dhe shkallën e zhvillimit të infrastrukturës rrugore të zonës.

4. Në tokat, kur sipërfaqet e tokës që jepen me qira nuk kanë të dhëna në librin e bonitetit për kategorinë e tokës, komisioni i ngritur sipas pikës 2 të këtij kreu, përcakton bonitetin e tokës përpara shpalljes së procedurës konkurruese.

5. Kur objekt i qiradhënies janë sipërfaqe toke bujqësore në të cilën përfshihen më shumë se një parcelë me kategori të ndryshme të tokës sipas bonitetit, përlllogaritja e vlerës bëhet veçantë për secilën parcelë, shuma e të cilave përbën edhe vlerën e përgjithshme të sipërfaqes së dhënë me qira.

6. Në rastet e qiradhënies së sipërfaqeve mbi 15 ha, nëse qiramarrësi të paktën brenda tri viteve të para nga përfundimi i afatit të realizimit të investimit fillestar sipas ofertës së paraqitur, ka realizuar një investim shtesë jo më të vogël se 1/3 e vlerës së investimit fillestar, atëherë qiramarrësi mund të kërkojë një ulje të vlerës së qirasë së tokës bujqësore deri në masën 20%.

7. Qiramarrësi ka të drejtë të përfitojë uljen e vlerës së qirasë, nëse investimi shtesë i kryer sipas përcaktimeve të pikës 6 të këtij kreu lidhet, ndër të tjera, me infrastrukturën e tokës objekt i qiramarrjes, teknologjinë e re të përdorur ose dhe me zhvillimin e

kapaciteteve agropërpunuese të produkteve të përfituara nga realizimi i investimit fillestar.

8. Ulja e qirasë sipas kriterëve të pikës 6 të këtij kreu, bëhet me kërkesë të qiramarrësit pranë autoritetit qiradhënës, duke paraqitur pranë tij dokumentacionin dhe llogaritë financiare të certifikuara, të cilat vërtetojnë kryerjen e investimeve.

9. Me marrjen e kërkesës pranë autoritetit qiradhënës, Ministri urdhëron ngritjen e komisionit të verifikimit të realizimit të investimeve sipas pikës 6 të këtij kreu. Mënyra e verifikimit të kriterëve sipas pikës 6 të këtij kreu, si dhe të dokumentacionit përkatës përcaktohet në urdhrin e Ministrit.

10. Të ardhurat financiare, që sigurohen nga dhënia me qira e tokës, arkëtohen për llogari të Buxhetit të Shtetit. Qiramarrësi e kryen pagesën e vlerës vjetore të qirasë brenda tremujorit të parë të vitit pasardhës.

11. Ulja e vlerës së qirasë sipas përcaktimeve sipas pikës 6 të këtij kreu do të merret parasysh në kuadër të zbatimit të paragrafit të fundit të nenit 6 të ligjit nr. 8318 datë 1.4.1998 "Për dhënien me qira të tokës bujqësore e pyjore, të livadheve dhe kullotave që janë pasuri shtetërore", të ndryshuar.

VI. AFATET E DHËNIES ME QIRA TË TOKAVE

1. Tokat jepen me qira për afate kohore si vijon:

a) deri në 10 vjet, kur destinohen për kultivim të bimëve të arave, eterovajore dhe bimëve dekorative. Në këtë rast, madhësia e sipërfaqes së tokës bujqësore që jepet me qira nuk mund të jetë më e vogël se madhësia e sipërfaqes së parcelës sipas së cilës ajo rezulton e regjistruar në dokumentacionin kadastral të DAMT-së ose sa madhësia e sipërfaqes së parcelës sipas së cilës ajo reflektohet në hartën treguese të tokës "HTR", pranë ZVRPP-s?

b) deri në 30 vjet, kur destinohen:

i) për krijimin dhe kultivimin e vreshtave;

ii) për krijim pemëtoresh me specie drufrutor, mosha biologjike e të cilave përkon me këtë kohë zgjatje kultivimi dhe me rentabilitet ekonomik;

iii) për ndërtim serrash e kultivim të bimëve në to; iv) fidanishte.

c) deri në 99 vjet, kur destinohen:

i) për krijim ullishtash;

ii) krijim pemëtoresh me drufrutor si kulturat arnore dhe specie të tjera, mosha biologjike e të cilave përkon me këtë kohëzgjatje;

iii) kur veprimtaria sipas shkronjave "a" dhe "b" të kësaj pike, shoqërohet me investime për përpunimin e plotë të prodhimeve të marra nga toka e dhënë me qira.

VI/1. PROCEDURAT QË NDIQEN NGA BQTB-JA PËR RASTE TË VEÇANTA

1. Familjet bujqësore ose individët, që kanë përfituar dhe posedojnë tituj pronësie mbi tokën bujqësore sipas vendimit nr. 452, datë 17.10.1992, të Këshillit të Ministrave,

"Për ristrukturimin e ndërmarrjeve bujqësore", të ndryshuar, dhe ligjit nr. 8053, datë 21.12.1995, "Për kalimin në pronësi pa shpërblim të tokës bujqësore", të ndryshuar, por që, nga veprimi i faktorëve natyrorë të fuqisë madhore, sipërfaqe të tokës në pronësi të tyre janë dëmtuar në mënyrë të pakthyeshme, kanë të drejtën e marrjes pjesë, në procedurën e konkurrimit, duke nisur me vlerën 1 euro, për toka bujqësore që rezultojnë në pronësi të shtetit, brenda njësisë administrative ku ata kanë vendbanimin dhe pronën.

2. Sipërfaqja e tokës bujqësore që jepet me qira mund të jetë deri sa përmasa e sipërfaqes së tokës së dëmtuar të familjes bujqësore ose individit.

3. Afati i qiradhënies është deri në 30 vjet.

4. Kërkesa për marrjen e tokës me qira nga familja bujqësore ose një grup individësh paraqitet me shkrim në ministri dhe shoqërohet me:

a) të dhëna për identitetin e kërkuesit / kërkuesve;

b) aktin e marrjes së tokës në pronësi dhe/ose certifikatën e pronësisë për sipërfaqen e dëmtuar;

c) një raport teknik për dëmtimin e sipërfaqes së tokës bujqësore të dëmtuar, i konfirmuar nga bashkia, Drejtoria e Bujqësisë dhe Drejtoria e Administrimit dhe Mbrojtjes së Tokës e qarkut përkatës;

ç) planimetrinë e sipërfaqeve të parcelave (pronave) që kërkohen për qiramarrje, në shkallën 1:2500;

d) pasqyrën kadastrale të parcelës/ave (pronësisë/ve) me madhësinë e sipërfaqes për secilën prej tyre;

dh) vërtetimin e siguar nga ZVRPP-ja për statusin juridik të pronësisë për të gjitha parcelat e tokës, objekt kërkese për qiramarrje, në rastin kur këto sipërfaqe përfshihen brenda zonave kadastrale ku është kryer regjistrimi fillestar i pasurive të paluajtshme, ose vërtetimin nga DAMT-ja e qarkut, në rastin kur këto sipërfaqe përfshihen në zona kadastrale ku nuk është kryer regjistrimi fillestar i pasurive të paluajtshme.

5. Kërkesa shqyrtohet nga BQTB-ja, i cili i paraqet ministrit propozimin për miratimin ose jo të saj brenda 3 ditëve.

6. Kryetari i BQTB-së merr masat për organizimin e procedurës, si më poshtë vijon:

a) Dërgon shpalljen e procedurës së konkurrimit pranë Qendrës së Botimeve Zyrtare, brenda ditës së miratimit nga ministri;

b) Në njoftimin për zhvillimin e procedurës së konkurrimit për dhënien e tokës me qira përcaktohen qëllimi i dhënies me qira të tokës, sipërfaqja, objekt qiradhënieje, vendndodhja e saj, si dhe vendi, data dhe ora e zhvillimit të kësaj procedure;

c) Afati i paraqitjes së ofertave zgjat 5 (pesë) ditë nga data e publikimit të njoftimit për procedurën konkurruese.

ç) Subjektet e interesuara për marrjen me qira të tokës bujqësore, objekt i procedurës së shpallur, i paraqesin ofertat për qiramarrje pranë autoritetit qiradhënës, brenda afateve të përcaktuara në njoftimin për zhvillimin e procedurës së konkurrimit.

7. Ofertat, me qëllim kualifikimin e tyre për vlerësim, duhet të përmbajnë dokumentacionin e mëposhtëm:

a) Të dhëna për identitetin e të interesuarit;

b) Një përshkrim të hollësishëm teknik të projektit për veprimtarinë bujqësore që do të zhvillohet, të shoqëruar me përcaktimin e kulturave bujqësore ose të specieve të bimëve që do të mbillen, teknologjive që do të aplikohen në kultivimin e bimëve dhe përpunimin e produkteve, investimeve në infrastrukturë (kullim, ujitje, sistemim etj.), të shprehura në tregues fizikë dhe monetarë, të dhëna për burimet e financimit të shprehura në vlerë që garantojnë investimet, ndikimin e veprimtarisë në shtimin e numrit të të punësuarve;

c) Planbiznesin e hollësishëm të aktivitetit që do të ushtrohet;

ç) Studimin për ndikimin në mjedis të projektit;

d) Afatin e qiramarrjes së sipërfaqes së kërkuar, në varësi edhe të kulturave bujqësore ose specieve të bimëve që do të mbillen, por jo më shumë se 30 vjet;

dh) Kohën e fillimit dhe mbarimit të mbjelljes së tokës me kultura bujqësore, në rastin e qiramarrjes së saj për pemëtore, vreshta dhe ullishte;

e) Nivelin e çmimit (lekë/ha në vit) që ofrohet për marrjen me qira të tokës bujqësore;

ë) Vërtetimin se nuk ka detyrime financiare ose ligjore të pashlyera ndaj shte tit.

8. Ofertat paraqiten në një zarf të mbyllur, i cili duhet të përmbajë një kopje origjinale dhe një fotokopje të dokumentacionit të ofertës, si dhe ku përcaktohen qartë identiteti dhe adresa e personit, fizik apo juridik, të interesuar. Në rast se paraqiten grup individësh, kërkesa mund të paraqitet nga një përfaqësues i pajisur me prokurë.

9. Në procesin e hapjes së ofertave marrin pjesë të gjithë anëtarët e BQTB-së dhe subjektet e interesuara për qiramarrje ose përfaqësuesit e tyre, të pajisur me prokurë dhe dokument identifikimi.
10. Kur ofertat nuk plotësojnë kushtet për kualifikim, atëherë ato skualifikohen nga konkurrimi. Ofertat e kualifikuara si të rregullta nga përmbajtja e dokumentacionit të paraqitur vlerësohen në vijim pa praninë e pjesëmarrësve, sipas kritereve të vlerësimit.
11. BQTB-ja harton procesverbalin e zhvillimit të procedurës konkurruese, ku përshkruan ofertuesit, dokumentacionin e paraqitur prej tyre, si dhe ofertuesit e kualifikuar e ata të skualifikuar.
12. BQTB-ja, brenda dy ditëve nga data e hapjes së procedurës konkurruese, shqyrton ofertat e kualifikuara si të rregullta, vlerëson me pikë ofertën, sipas kritereve të vlerësimit, dhe harton vendimin për renditjen e ofertuesve.
13. Fitues i procedurës konkurruese shpallet me vendim të BQTB-së subjekti me më shumë pikë të grumbulluara.
14. Ankimi mund të kryhet sipas procedurave të përcaktuara në kreun IV, të këtij vendimi."

VII. DISPOZITAT E FUNDIT

1. Pikat 1, 2 dhe 3 të vendimit nr. 830, datë 28.12.1998 të Këshillit të Ministrave "Për kriteret e përlllogaritjes së vlerës vjetore të qirasë së tokave bujqësore, pyjore, me bimësi pyjore, livadheve dhe kullotave, pasuri shtetërore", vendimi nr. 831, datë 28.12.1998 i Këshillit të Ministrave "Për mënyrën e dhënies me qira të tokës bujqësore, pasuri shtetërore", i ndryshuar, dhe udhëzimi nr. 3, datë 28.12.1998 i Këshillit të Ministrave "Për procedurën e zhvillimit të ankandit të dhënies me qira të tokës bujqësore, pasuri shtetërore", shfuqizohen.
2. Ngarkohet Ministria e Bujqësisë, Ushqimit dhe Mbrojtjes së Konsumatorit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Edi Rama